



Na.33. Msimu wa Kilimo 2022/23

Tathmini ya Agosti 21-31, 2023 na Matazamio kwa Kipindi cha Septemba 1-10, 2023

MUHTASARI

- Kwa ujumla maeneo mengi ya nchi yanatarajiwa kuwa na hali ya ukavu.
- Wakulima katika maeneo yanayopata mvua za Vuli wanashauriwa kuendelea na shughuli za kuandaa mashamba kwa ajili ya msimu wa kilimo unaotegemea mvua za Vuli.


MIFUMO YA HALI YA HEWA KATIKA KIPINDI CHA AGOSTI 21-31, 2023

Kipindi hiki, migandamizo mikubwa ya hewa iliyopo kusini mwa dunia (St. Helena na Mascarene) iliimarika wakati ile iliyopo kaskazini (Azore na Siberia) ilipungua nguvu. Hali hii iliendelea kuimarisha mgandamizo mkubwa wa hewa na kupelekea upepo wenye baridi katika maeneo mengi ya nchi.

Joto la bahari katika eneo la mashariki mwa bahari ya Hindi lilikuwa la chini kidogo ya wastani wakati joto la bahari la magharibi mwa bahari ya Hindi lilikuwa la juu kidogo ya wastani. Hali hii ilipelekea upepo wenye unyevunyevu kuvuma kuelekea katika maeneo ya pwani nchini.

TATHMINI YA MVUA KATIKA KIPINDI CHA AGOSTI 21-31, 2023

Katika kipindi hiki, maeneo mengi yalikuwa makavu, wakati baadhi ya maeneo nchini yalipata mvua nyepesi kiasi cha milimita chini ya 25 katika siku 10 husika. Ni maeneo machache tu yaliyopata zaidi ya milimita 25 za mvua, kama inavyoonekana katika Kielelezo.



Kielelezo: Kiasi cha mvua cha Agosti, 21-31, 2023 kama kilivyokadiriwa na satellite (RFE)

TATHMINI YA HALI YA KILIMO KATIKA KIPINDI CHA AGOSTI 21-31, 2023

Katika dikadi hii maeneo mengi nchini yalikuwa makavu kwa ujumla.

Maeneo ya ukanda wa pwani na maeneo ya maziwa makuu yalikuwa na vipindi vya upepo wa wastani hadi mkali vilivyoambatana na mawimbi makubwa ambao uliathiri shughuli za uvuvi katika maeneo hayo.

Kwa maeneo yanayopata mvua za vuli, wakulima waliendelea na uandaaji wa mashamba kwa ajili ya msimu wa kilimo wa mvua za vuli.

Upatikanaji wa maji na malisho kwa ajili ya mifugo ulipungua katika maeneo mengi nchini.

HALI YA MAJI KATIKA KIPINDI CHA AGOSTI, 21-31, 2023

Kwa ujumla kina cha maji katika mabwawa na mtiririko wa maji kwenye mito vimeendelea kupungua katika mabonde mengi nchini kutokana hali ya ukavu inayoendelea.

MIFUMO YA HALI YA HEWA INAYOTARAJIWA KATIKA KIPINDI CHA SEPTMBA 1-10 2023

Katika kipindi hiki, migandamizo mikubwa ya hewa iliyopo kusini mwa dunia inatarajiwa kupungua nguvu kidogo wakati ile iliyopo kaskazini inatarajiwa kuimarika kidogo. Hali hii inatarajiwa kuusukuma ukanda mvua (ITCZ) kuelekea kusini hadi katika maeneo yaliyopo kaskazini mwa nchi (baadhi ya maeneo ya ukanda wa ziwa Victoria).

Joto la bahari katika eneo la magharibi mwa bahari ya Hindi linatarajiwa kuwa la juu kidogo ya wastani wakati lile lililopo mashariki mwa bahari ya Hindi linatarajiwa kuwa la wastani hadi chini kidogo ya wastani. Hali hii inatarajiwa kusababisha upepo hafifu wenye unyevunyevu kuelekea katika maeneo ya ukanda wa pwani.

HALI YA HEWA INAYOTARAJIWA KATIKA KIPINDI CHA SEPTMBA 1-10, 2023

Maeneo ya kanda ya Ziwa Viktoria (mikoa ya Kagera, Geita, Shinyanga, Mwanza, Simiyu na Mara) yanatarajiwa kuwa na mvua na ngurumo katika maeneo machache.

Magharibi mwa nchi (mikoa ya Kigoma, Katavi na Tabora), kanda ya kati (mikoa ya Dodoma na Singida), na nyanda za juu kaskazini mashariki (mikoa ya Arusha, Manyara na Kilimanjaro), nyanda za juu kusini magharibi (mikoa ya Rukwa, Songwe, Mbeya, Njombe na Iringa), pwani ya kusini (mikoa ya Mtwara na Lindi) na kanda ya kusini (mkoa wa Ruvuma na kusini mwa mkoa wa Morogoro) yanatarajiwa kuwa na hali ya ukavu kwa ujumla.

Pwani ya kaskazini (mikoa ya Tanga, kaskazini mwa mkoa wa Morogoro, Pwani na Dar es Salaam pamoja na visiwa vya Unguja na Pemba) inatarajiwa kuwa na mvua nyepesi katika maeneo machache.

HALI YA HEWA KILIMO: MATARAJIO NA USHAURI KATIKA KIPINDI CHA SEPTMBA 1-10, 2023

Hali ya ukavu inayotarajiwa itasaidia shughuli za uandaaji wa mashamba hususan kwa maeneo yanayopata mvua za vuli. Wakulima katika maeneo yanayopata mvua za Vuli wanashauriwa kuendelea na shughuli za kuandaa mashamba kwa ajili ya msimu wa kilimo unaotegemea mvua za vuli.

Wavuvi wanashauriwa kuendelea kufuatilia taarifa za hali ya hewa za kila siku, hususan kwenye bahari ya Hindi na maziwa makuu ili kufanya maamuzi juu ya wakati sahihi wa kwenda kufanya shughuli za uvuvi kutokana na hali ya upepo inayojitokeza mara kwa mara.

Kutokana na hali ya ukavu inayotarajiwa katika maeneo mengi nchini, wafugaji wanashauriwa kutumia maji na malisho yaliyopo kwa uangalifu.

HALI YA MAJI INAYOTARAJIWA KATIKA KIPINDI CHA SEPTMBA 1-10, 2023

Kina cha maji katika mabwawa na mtiririko wa maji kwenye mito vinatarajiwa kuendelea kupungua kutokana na hali ya ukavu inayotarajiwa katika maeneo mengi. Jamii inashauriwa kuendelea kutumia maji yaliyopo kwa uangalifu kufuatia kuendelea kwa msimu wa ukavu katika maeneo mengi nchini.